



PATNUBAY SA MISA



12 Abril 2015

Ika-2 Linggo ng Pasko ng Pagkabuhay

Taong B

KAPISTAHAN NI KRISTONG HARI NG AWA

Pinaglalaanan at Palatandaan ng Maawaing Pagmamahal ni Kristo

Sa una niyang pagpapakita sa kanyang mga alagad, pinuspos sila ni Hesus ng mga handog ng kanyang presensiya at kapayapaan, ng tawag na makilahok sa kanyang misyon, at ng Espiritu Santo. Sa mga handog na ito pinatibay niya ang kanilang pananalig, dinagdagan ang kanilang galak, at pinalakas sila sa kanilang pakikipaglaban sa kasalanan.

Ang mga handog na ito ay inilalaan hindi lamang sa mga alagad kundi sa lahat din ng nananalig, kasama na ang mga hindi pa kailanman nakakita sa kanya. Ang mga ito’y para sa ating lahat ngayon kung bubuksan natin ang ating mga puso sa pananampalataya sa Muling Nabuhay at batiin siya sa mga salita ng nagbagong-loob na si Tomas, “Panginoon ko at Diyos ko!”

Ipinagdiriwang natin ngayon ang kapistahan ni Hesus, Hari ng Banal na Awa. Ang ganitong nakalulugod na debosyon sa mahabaging pag-ibig ni Kristo sa mga makasalanan ay mahalaga sa ating lahat, pagkat kailangan nating makalaspag ng pagmamahal. Gayundin, tungkulin nating maging mga kasangkapan ng kanyang awa sa ating kapwa. Sa Eukaristiyang ito, hilingin natin ang biyayang ito.



PASIMULA



Pambungad

(Ipahahayag lamang kung walang awiting nakahanda.)

Kayong mga bagong silang ay maghanggap na makamtan ang gatas na espirit’wal na dulot ng Amang banal. Aleluya! S’ya’y awitan.

Pagbati

P– Papuri at karangalan kay Hesus, Hari ng Awa! Nawa ang kanyang pagpapala at kapayapaan ay sumainyong lahat.

B– At sumaiyo rin!

Pagsisisi

P– Mga kapatid, sa harap ni Hesus, ating Hari ng Awa, pag-

ibayuhin natin ang kamalayan sa ating maraming pagkukulang at sa pangangailangang mapadali-say sa pamamagitan ng kanyang pagpapatawad. (Tumigil sandali.)

P– Sa mga pagkakataong kami’y nabigong magkaisa sa puso at isipan sa aming mga pamilyan at mag-anak, Panginoon, kaawaan mo kami!

B– Panginoon, kaawaan mo kami!

P– Sa mga pagkakataong kami’y nabigong magbigay saksi sa iyong muling pagkabuhay, Kristo, kaawaan mo kami!

B– Kristo, kaawaan mo kami!

P– Para sa mga pagpapabaya naming maging mga tanda at kasangkapan ng iyong pag-

ibig, Panginoon, kaawaan mo kami!

B– Panginoon, kaawaan mo kami!

P– Kaawaan tayo ng makapang-yarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B– Amen!

Papuri

B– Papuri sa Diyos sa kaitaasan at sa lupa’y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasasalamat ka namin dahil sa dakila mong angking kapurihan. Panginoong Diyos, Hari ng langit, Diyos

Amang makapangyarihan sa lahat.

Panginoong Hesukristo, Bug-tong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tang-gapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen!

Panalangin Pambungad

P –Ama naming makapangyarihan, sa pagdiriwang naming ito ng Pasko ng Pagkabuhay ng Anak mo, pinag-alab mo ang pananalig namin sa iyo. Ang kagandahang-loob mo sa amin ay lalo mo pang pag-ibayuhin upang maisaloob na mabuti ng lahat ang kadalisyang dulot ng binyag, ang Espiritung bigay mo sa iyong mga anak, ang Dugong dumanak upang kami’y maligtas, sa pamamagitan ni Hesukristo kasama ng Espiritu Santo magpasawalang hanggan.

B –Amen!

PAGPAPAHAYAG NG SALITA NG DIYOS



Unang Pagbasa Gw 4:32-35

Sa paglalarawan sa mga unang Kristiyanong pamayanan, binibigyang diin ni San Lucas ang pagkakaisa at pagkabukaspalad ng mga kasapi nito. Ang ating sariling pamayanan ay nararapat ding makilala sa dalawang katangiang ito.

L – Pagpapahayag mula sa mga Gawa ng mga Apostol

Nagkaisa ang damdami’t isipan ng lahat ng sumasampalataya at di itinuring ninuman na sarili niya ang kanyang mga ari-arian, kundi para sa lahat.

Ang mga apostol ay patuloy na gumagawa ng kababalaghan at nagpapatotoo sa muling pagkabuhay ng Panginoong Hesus. At ibinuhos ng Diyos ang kanyang pagpapala sa kanilang lahat.

Walang nagdarahop sa kanila, sapagkat ipinagbibili nila ang kani-

lang lupa o bahay, at ang pinagbilhan ay ibinibigay sa mga apostol. Ipinamamahagi naman ito ayon sa pangangailangan ng bawat isa.

Ang Salita ng Diyos!

B –Salamat sa Diyos!

Salmong Tugunan Awit 117

B –*Butihing Poo’y purihin, pag-ibig n’ya’y walang maliw!*

R. M. Velez



Bu- ti- hing Po-o’y pu- ri- hin, pag-



i- big n’ya’y wa-lang ma-liw!

* **O pasalamatang ang Diyos na Panginoon, pagkat siya’y mabuti; ang kanyang pag-ibig ay napakatatag at mananatili. Ang taga-Israel, bayaang sabihi’t kanilang ihayag, “Ang pag-ibig ng Diyos ay hindi kukupas.”** **B.**

* **Ang lakas ng Poon ang siyang nagdulot ng ating tagumpay sa pakikibaka sa ating kaaway. Aking sinasabing di ako papanaw, mabuhay ako upang isalaysay ang gawa ng Diyos na Panginoon ko. Pinagdusa ako at pinarusahan nang labis at labis, ngunit ang buhay ko’y di niya pinatid.** **B.**

* **Ang batong natakwil ng nangagtatayo ng tirahang-bahay, sa lahat ng bato’y higit na mahusay. Ang lahat ng ito ang nagpamalas ay ang Panginoong Diyos. Kung iyong mamasdan ay kalugod-lugod. O kahanga-hanga ang araw na itong ang Diyos ang nagbigay, tayo ay magalak, ating ipagdiwang!** **B.**

Ikalawang Pagbasa 1 Jn 5:1-6

Si San Juan ay nagpapalaala sa ating may likas at mahalagang kaugnayan ang pag-ibig ng Diyos at pagsunod sa Kanyang mga utos. Sa kaugnayang ito, lumalakas tayo para madaig natin ang kasamaan.

L – Pagpapahayag mula sa Unang Sulat ni Apostol San Juan

Minamahal kong mga kapatid: Inaaring mga anak ng Diyos ang sumasampalatayang si Hesus ang Mesiyas; at sinumang umiibig sa

ama ay umiibig din sa mga anak.

Ito ang palatandaang iniibig natin ang mga anak ng Diyos: kapag iniibig natin ang Diyos at tinutupad ang kanyang mga utos, sapagkat ang tunay na umiibig sa Diyos ay yaong tumutupad ng kanyang mga utos. At hindi naman mahirap sundin ang kanyang mga utos, sapagkat napagtatagumpayan ng bawat anak ng Diyos ang sanlibutan; at nagtatagumpay tayo sa pamamagitan ng pananampalataya. Sino ang makapagtatagumpay laban sa sanlibutan? Ang sumasampalatayang si Hesus ang Anak ng Diyos.

Si Hesukristo ang naparito sa sanlibutan, bininyagan sa tubig, at nagbubo ng kanyang dugo sa kanyang kamatayan – hindi lamang bininyagan sa tubig, kundi nagbubo pa ng kanyang dugo. Ang Espiritu ang nagpapatotoo tungkol dito, sapagkat ang Espiritu ay katotohanan.

Ang Salita ng Diyos!

B –Salamat sa Diyos!

Aleluya

Jn 20:29

B –Aleluya! Aleluya!

Mapalad at maligaya ang sumasampalataya sa di nakita ng mata.

Aleluya! Aleluya!

Mabuting Balita Jn 20:19-31

Ang mga pagpapakita ni Kristong Nabuhay ay para mapalakas sa pananampalataya ang mga disipulo sa katunayan ng kanyang muling pagkabuhay at tulutan silang makatupad sa kanilang misyon. Ito’y mailalapat din sa bantulot na si Tomas at sa ating lahat.

P – Ang Mabuting Balita ng Panginoon ayon kay San Juan

B – Papuri sa iyo, Panginoon!

Kinagabihan ng Linggo ding iyon, ang mga alagad ay nagkakatipon. Nakapinid ang mga pinto ng bahay na kanilang pinagtatipunan dahil sa takot nila sa mga Judio. Dumating si Hesus at tumayo sa gitna nila. “Sumainyo ang kapayapaan!” sabi niya. Pagkasabi nito, ipinakita niya ang kanyang mga kamay at ang kanyang tagiliran. Tuwang-tuwa ang mga alagad nang makita ang Panginoon. Sinabi na naman ni Hesus, “Sumainyo ang kapayapaan! Kung paanong sinugo ako ng Ama, gayon din naman, sinusugo ko kayo.” Pagkatapos, sila’y hiningahan niya at sinabi, “Tanggapin ninyo

ang Espiritu Santo. Ang patawarin ninyo sa kanilang mga kasalanan ay pinatawad na nga; ang hindi ninyo patawarin ay hindi nga pinatawad.”

Ngunit si Tomas na tinaguriang Kambal, isa sa Labindalawa, ay wala roon nang dumating si Hesus. Kaya’t sinabi sa kanya ng ibang alagad, “Nakita namin ang Panginoon!” Sumagot si Tomas, “Hindi ako maniniwala hangga’t di ko nakikita ang butas ng mga pako sa kanyang mga kamay, at naisusuot dito ang aking daliri, at hangga’t hindi ko naipapasok ang aking kamay sa kanyang tagiliran.”

Makalipas ang walong araw, muling nagkatipon sa loob ng bahay ang mga alagad; kasama nila si Tomas. Nakapinid ang mga pinto, ngunit pumasok si Hesus at tumayo sa gitna nila. Sinabi niya, “Sumainyo ang kapayapaan!” Saka sinabi kay Tomas, “Tingnan mo ang aking mga kamay at ilapit dito ang iyong daliri. Ipasok mo ang iyong kamay sa aking tagiliran. Huwag ka nang mag-alinlangan, maniwala ka na.” Sumagot si Tomas, “Panginoon ko at Diyos ko!” Sinabi sa kanya ni Hesus, “Naniniwala ka na ba sapagkat nakita mo ako? Mapapalad ang mga naniniwala kahit hindi nila ako nakita.”

Marami pang kababalaghang ginawa si Hesus na nasaksihan ng mga alagad, ngunit hindi natatala sa aklat na ito. Ang mga natala rito’y sinulat upang sumampalataya kayong si Hesus ang Mesiyas, ang Anak ng Diyos, at sa gayo’y magkaroon kayo ng buhay sa pamamagitan niya.

Ang Mabuting Balita ng Panginoon!

B – Pinupuri ka namin, Panginoon ng Hesukristo!

Homiliya

Sumasampalataya

B– Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inililing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos

Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P–Tayo ay kabilang sa mga nananalig sa muling pagkabuhay ni Hesus kahit na hindi natin naisuot ang ating daliri sa butas ng pako sa kanyang mga kamay at naipasok ang ating kamay sa kanyang tagiliran. Pag-ibayuhin natin ang ating pagpapahayag ng pananampalataya kay Kristong Muling Nabuhay habang idinudulog ang ating mga kahilingan sa kanya, sa pagsabing:

B – Aming Panginoon at aming Diyos, pakinggan mo kami!

* Upang ang pangkalahatang Simbahan at ang bawat pamayanang lokal ay laging maghandog ng magandang halimbawa ng pagkakaisa, tapat na pagmamalasakit at pangangalaga sa mga dukha. Manalangin tayo! **B.**

* Upang ang ating mga “Basic Ecclesial Communities” o “BEC” at iba pang samahang pansimbahan ay pagmulan ng pagpapani-bago sa Simbahan at maging tagapagpalaganap ng ebanghelyo sa lipunan. Manalangin tayo! **B.**

* Upang ang mga tulad ni Tomas na nahihirapang maniwala sa Muling Pagkabuhay ay makakita ng patotoo rito sa buhay ng mga tunay na Kristiyanos. Manalangin tayo! **B.**

* Upang ang lahat ng Katoliko ay makinabang sa sakramento ng kumpisal bilang karaniwang pamamaraan upang malasap ang “kapangyarihan ng Muling Pagkabuhay” sa kanilang buhay espirituwal. Manalangin tayo! **B.**

* Upang lahat tayo ay maging masiglang tagapagpalaganap ng kapayapaan ng muling nabuhay na Kristo sa lipunan at sa ating sariling kapaligiran. Manalangin tayo! **B.**

* Ipanalangin natin ang ating mga pansariling kahilingan. (*Tumahimik sandali.*)

Manalangin tayo! **B.**

P– Panginoong Hesus, nagpapasalamat kami sa mga kaloob ng iyong muling pagkabuhay, at sa iyong presensiya at ng Espiritu Santo. Nawa lalo kaming ilapit sa iyo ng mga ito at gawin kaming mga palatandaan at kasangkapan ng bagong buhay na ipinagkaloob mo sa amin. Ikaw na nabubuhay at naghahari magpasawalang hanggan.

B – Amen!



P– Manalangin kayo . . .

B– Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P– Ama naming Lumikha, tung-hayan mo ang mga alay ng iyong sambayanan upang ang iyong binigyan ng bagong buhay sa pagsampalataya sa iyong ngalan at pagkadalisay noong sila’y binyagan ay makapakinabang sa ligayang walang katapusan, sa pamamagitan ni Hesukristo kasama ng Espiritu Santo magpasawalang hanggan.

B – Amen!

Prepasyo ng Pagkabuhay I

P– Ama naming makapangyarihan, tunay ngang marapat na ikaw ay aming pasalamat na lalo ngayong ipinagdiriwang ang paghahain ng Mesiyas, ang maamong tupa na tumubos sa aming lahat.

Ang iyong Anak na minamahal ay naghain ng sarili niyang buhay. Siya ang tupang maamong umako sa kaparusahan upang mapatawad ang kasalanan ng sanlibutan. Sa pagkamatay niya sa banal na krus, ang kamatayan namin ay kanyang nilupig. Sa pagkabuhay niya bilang Manunubos, pag-asa’t pagkabuhay ay aming nakamit.

Kaya kaisa ng mga anghel na nagsisiawit ng papuri sa iyo nang

walang humpay sa kalangitan, kami'y nagbubunyi sa iyong kadakilaan:

B—Santo, santo, santo . . .

Pagbubunyi

B—Sa krus mo't pagkabuhay kami'y natubos mong tunay, Poong Hesus naming mahal, iligtas mo kaming tanan ngayon at magpakailanman.



B—Ama namin . . .

P—Hinihiling namin . . .

B—Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B—Kordero ng Diyos . . .

Paanyaya sa Pakikinaabang

P—Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

B—Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinaabang

(Ipahahayag lamang kung walang awiting nakahanda.)

Ako ay iyong hawakan sa sugat sa aking kamay, sa paa kong pinakuan. Aleluya! Panaligan nang di nag-aalinlangan.

Panalangin Pagkapakinabang

P—Ama naming mapagmahal, ipagkaloob mong ang aming pakikinaabang sa banal na piging ng Pasko ng Pagkabuhay ay patuloy na umiral sa aming kalooban, sa pamamagitan ni Hesuskristo kasama ng Espiritu Santo magpasawalang hanggan.

B—Amen!



P—Sumainyo ang Panginoon.

B—At sumaiyo rin!

P—Magsiyuko kayo at ipanala-

ngin ang pagpapala ng Diyos. (Manahimik saglit.)

Sa muling pagkabuhay ng Kanyang Anak, tinubos kayo ng Diyos at ginawa kayong mga anak Niya. Puspusin nawa kayo ng Kanyang kagalakan.

B—Amen!

P—Sa pananampalataya, bumangon kayong kasama ni Hesus sa bautismo upang makasama niya magpakailanman.

B—Amen!

P—Pinagpala kayo ng maawaing pagmamahal ni Kristo. Nawa kayo'y maging mabisang palatandaan ng kanyang pagmamahal sa lahat.

B—Amen!

P—Pagpalain kayo ng makapangyarihang Diyos: Ama at Anak at Espiritu Santo.

B—Amen!

P—Tapos na ang Misa. Humayo kayo sa kapayapaan ni Kristong Nabuhay!

Aleluya! Aleluya!

B—Salamat sa Diyos!

Aleluya! Aleluya!

MABUHAY, HARI NG AWA!

Mabuhay, Hari ng Banal na Awa,
Hari ng Luwalhati, Hari ng Pagsuyo!
Mga sinag ng makukulay na liwanag
buhay sa iyong puso

Para maging bukal ng pag-asa, at ginhawa't lugod
Sa lahat ng sawimpalad at mga nasiphayo.

Dumudulog akong makasalana't nasasaktan
Nakayuko't umiiwas na ako'y mamasdan
Ng bukal ng kabanalan at ng kasiyahan.

Batid kong di ako karapat-dapat na sa iyo'y humarap,
Pagkat kung ilang ulit nang kita'y tinalikdan
Sa aking kapalalua't paghahanap-kasiyahan.

Ngunit batid ko rin sa kaibuturan ng kaloobang
Pag-ibig mo sa aking hanggang kamatayan
Ay higit na di-hamak sa aking mga kasalana't
Higit din ang iyong habag sa aking kaabaan.

Ako ngayo'y nagsusumamong paghilumin nawa ako

Tulad ng suwail mong mga disipulo't
Nitong si Tomas, alinlangang alagad mo.

Ipatong nawa ang iyong kamay
at pawiin ang mga kasalanan ko,
Daigin nawa ang aking pag-aalinlangan

ng liwanag nitong presensiya mo,
Biyaya ng Iyong nagbibigay-buhay na Espiritu't
Patunay ng kapangyariha't sadyang panlunas mo,
Puspos ng kalinga at awa mong magiliw.
Pawiin sa akin ang pag-aalinlanga't
manalig sa iyo lamang,
Tanging bukal ng pag-asa't aking kaligtasan.

Gawin mo nawa ang nais mo sa akin:
Malinaw na tanda't mabisang kasangkapan
Ng iyong pagmamahal na para sa lahat
Lalo na sa mahihina, mga api't pinabayaan,
Mga mahirap mahalina at inaayawan.
Ako sana'y maging kung ano ka sa akin:
Bukal ng pag-asa, bukal ng kasiglahan,
Bukal ng kahuluga't bukal ng kagalakan.

Gayon nga ang misyon ko't itinatanging kapalaran.
Ito ang magbibigay-halaga sa buhay kong iniingatan—
Mahalaga sa marami, gaya ng iyong maasahan.
Ito ang magiging l'walhati kong pangmatagan
Habang lahat ng iba'y maglalaho't mapaparam.
Dito matatagpuan ang ligayang walang hanggan
Gayundin ang kapayapaang magpakailanman. AMEN!



**WORD & LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 894-5401; 894-5402; 892-2169 • Telefax: 894-5241 • Website: www.wordandlife.org

• E-mail: marketing@wordandlife.org, wordandlifepublications@gmail.com • FB: Word & Life Publications

• Editorial Team: Fr. S. Putzu, C. Valmonte, Sr. F. Santos, SMI, G. Ramos, R. Molomog, D. Daguio,

V. David • Illustrations: A. Sarmiento, B. Cleofe • Circulation: F. Edjan